

PABOJA ETEHUE'YO TIMOTEO QUE BECANEJJIJJI PEA'AI 2 TIMOTEO

Pabohua Eyacuiñajjiya esohui tehue ca o'oyanaje Timoteo que

¹ Timoteo, eyaya esohui mi que tehueje o'oya. Eya Pabo, Jesosa Quitoja esohui huohuijji. E'e, Eyacuiñajjiya eya huoojea canaje ojaya esohui huohui'yohua jama ba'a: Jesosa Quito nijje e'e jojo nei jjapeequianijo, onijje eyajo eseya ba'e tiitii mee caje'yo Eyacuiñajjiya.

² Timoteo, miya ecuea quea jea nee nee, ecuea ebacua ejja jayojja jama Jesosa Quito nijje jjapeequianijo. ¡Eyacuiñajjiya esejaya Chii ai eyajo aniya, Jesosa Quitohua esejaya Emeshi Mese neiya pea'aiya miya cajaanuana cahua quea pame nee! ¡Mijo cjjashahuabaquiahua quea pame nee! ¡Miya quea bei nee capo mee cahua pea'ai!

³ Eyacuiñajjiyo eya quea bihui nee chacochoani bicho'ama nei nei. Jamaya ecuea etiiquiana cuana pea'ai poa. Timoteo, miya quea ja'a nee ba'yanijo, eyaya Eyacuiñajji janobajjima nei bihuiaña mijo. E'e, mijo pea'ai eya onijje mimi huicha'a huicha'ani ojjaña mecajje, ojjaña pojajajo pea'ai.

⁴ Miya pa neineinaje e poqui'yajo. Maya ecuea pajea'yo jjima. Eya mi ba sa neinei poani quea bihui nee epojji.

⁵ Eya jjashahuabaquiani jama ba'a: Miya Eyacuiñajjija esohui jayojja jama aña quea bihui nee. Ecuea eba yahuajo miquea yano mese Moina bajjaniya, miquea enaese Enise pea'aiya Eyacuiñajjija esohui jayojja jama aca poa quea bihui nee. E'e, jamajjeya o jayojja jama jjeya miya Eyacuiñajji nijje e'e jojo nei jjapeequiani.

⁶ Jamajjeya eyaya miya huohui o'oyaña jama ba'a: Yahuajo mijo Eyacuiñajji nijje mimi majje eyaya miya huoojeanaje ojaya echacojji epojji. E'e, sapa napa'ajjanaje emeya Jesusaja echacojji quea pame epojji. Jamajjeya Eyacuiñajjiya miya Jesusaja epeeji jaahuana sahua cani. ¡Jamaya ojo chaco tiitiicue!

⁷ E'e, Edojjoshahua Pameya, Eyacuiñajjija huoojea'yohua eseya mete'ama po mee cani. Quea ja'a nee Eyacuiñajjijo chaco mee ca'yani. Eseyaya Eyacuiñajji, pea cuana pea'ai quea jea nee po meesahua ca'yani pea'ai. Quea ja'a nee jjashahuabaqui mee cani pea'ai, Edojjoshahua Pameya.

⁸ Jamajjeya esejaya Emeshi Mese neiyo huohuiañajo ja'a quea bicho pojji, miya! Eya onijje jjapeequianijo, dejja quea mase cuaa eya iña majje jeanobia canaje. Eyacuiñajjija esohui quea pame nee huohuiañajo eya napa cani cuaa. Jamatii ja'a quea bicho pojji ejo! Chojja. E jayojja jama napa cajo, ja'a oe quea mete pojji! Eyacuiñajjiya miya quea ca'a po meesahua canijo, ja'a ojaya esohui huohui pajea'yojji!

⁹ Ohuaya esejaya mimishi cuijea ca'yonaje. Jamajjeya cuaqui yasijje epoqui'yojji pojjeama. Iyaa ca'yonaje ojo quea pame nee eba'e'yojji, ma

ojaya epeejjime epo'yojji. ¿A'a eseya quea pame poanijo, ohuaya eseya iyaa ca'yonaje onijje ej-japeequijji? Chojja. Yahuaajo nei nei meshi pana jjimahuaajo Eyacuiñajji jjashahuabaquia poa Jesosa Quito huoojeajji esejaya mimishi cuana cui-jea'yojji.

¹⁰ E'e, yahuaajo esejaya ba jjima poa ojjaña cuana Eyacuiñajjiya quea jea nee nee acani. Jjeya ca ca esejaya eba. Ese jaahuanajji Jesosa Quito poeyanaje. Mano'yonaje. Mano'yo majje shequi o'oyanaje. Eyahuasijje jjequisohua ca'yonaje. Eseyá ohuaya jama acanaje ba'a: —Mano'yo majje miqianaya cuana ba'e tiitiije'yo Eyacuiñajji nijje —Jesosaa acanaje.

Jamajjeya ohuaya mete'ama po mee caje'yo eseya mano'yanijo. Ba'e tiitii mee caje'yo ojaya esohui quea pame nee ba mee canijo.

¹¹ Ma esohui quea pame nee Jesosa Quitoja eyaya huohuiaña. Eyacuiñajjiya eya huoojea ca'yonaje ojaya esohui huohuiya, ojjaña cuana jjabahuejjaqui meeya pea'ai.

¹² Ma esohui huohuiañajo, pea cuaa eya napa cani. Quea nee poani eya. Jamatii eya bicho'ama Jesosa Quitojo. Eyacuiñajji ecuea eba nei nei. E'e jojo nei oya ese jaahuanajji, de. Jamajje ecuea eba ojaya esohui jayojja jama eya ameesahua tiitii caje'yo ohuaya, Jesosa poe o'oyajo.

¹³ Ma esohui e'e nei Jesosa Quitoja eyaya miya ba meenaje. ¡Ecuea esohui jayojja tii huohucue! Jamaya poanijo ¡Jesosa Quito shajja'ajjacue! ¡Eyacuiñajji quea jea nee acue pea'ai, jamaya Jesosa Quitoja miya po meesahua canijo!

14 Ohuaya miya jiquio esohui quea pame neejo jjabahuejjaqui meesahua canaje. ¡Ma esohui jayojja jama po tiitiicue! Edojjoshahua Pameya esejo nequi tiitianiya miya jamaya asahua caje'yo.

15 Quea huiso dejja Asia meshijo ba'e enijje jjapeequi pajea'yonaje. Pijeno, Enojene pea'ai jamaya poanaje. Maya miquea eba.

16 Ecuea Emeshi Mese neiya dejja Onesipono bajjani, ojaya huapa pojjeama pea'ai caba'e meesahua cahua quea pame nee. Ohuaya eya quea jaji nee po mee canaje. Pea dejja cuaa eya jeanobia canaje. Jamatii oya, Onesipono ejo bicho'ama poanaje.

17 E'e, Shoma cuiñajji yasijje poe majje, eya sa'ajja neinei'yo majje eya ba ca'yonaje, Onesiponohua.

18 Jamajjeya esejaya Emeshi Mese neiya poe o'oya majje Onesipono sosequia caje'yo. Jamajjeya ohuaya Onesipono jaahuana tiitii caje'yo quea pame nee. Dejja mimishi ca ca quea nee po mee caje'yo tii tii. E'e, miquea eba eya Epeso cuiñajjijo nequijo, Onesiponohua eya quea pame nee ba'e meesahua ca poa.

2

¡Echacojji quea pame jayojja jama pocue Jesusajo!

1 E'e Timoteo, miya ecuea ebacua ejja jayojja. Miya quea ca'a po mee cani Jesosa Quitohua, ese jaahuanajjiya. Jamajjeya ¡quea pame tiitii jjapeequicue onijje!

² Miyaya ecuea esohui shajja'ajjanaje. Quea huiso dejjaa shajja'ajja canaje pea'ai. ¡Jiquio esohui huohuicue miyaya Jesusaja epeeji e'e jojo nei yasijje! Ona jjabahuejjaqui majje ¡ma esohui quea pame che jja oma oe huohui meesahuacue quea pame nee pea cuana huasijje!

³ Pea cuaa miya napa caje'yo Jesosa Quito nijje jjapeequianijo; jamatii ¡a'a quea mete pojji! ¡Jjapee tiitiquicue e'e jojo nei! ¡Emeshi Mese neiya echacojji quea ca'a pocue!

⁴ Jama ba'a: Dejja echacomeejjijo chaco canijo pea nijje chaco chaco sa po ajja. Chojo. Ohuaya ojaya echacomeejjija esohui jama chaco cani. ¡Jamaya oe pocue; Jesosa Quito nijje chaco chaco anijo a'a eshahua nijje pojji!

⁵ Jamajjeya jama poani pea'ai ba'a: Dejja janobajjima nei cuajicuaji neinei ani pea cuana nijje. Joya ebionei cuajicuaji coani oe aquiana quea pame quia cani sosema'. Jiquio ecua ohua huohui caje jama mi cuajicuajiajo, shajjama' poajo, aquiana equiajji pojjeama. ¡Jamaya jjashahuabaquicue Jesosa Quitojo chacoañajo; janobajjima chacocue! ¡A'a shajjama' jayojja jama pojji!

⁶ Dejja quejo janobajjima nei chaco'yo majje, que bana majje pea'ai ohuaya ebionei bobi cachicha cahua ojaya e'ijjiajji. Jamajjeya ¡a'a quea huea pojji Jesosa Quitojo chaco chaco ani!

⁷ ¡Jiquio ecuea esohuijo jjashahuaba neinei quicue, miya! Eseyaya Emeshi Mese neiya miya jiquio esohui ba meesahua caje'yo.

⁸ Jamajje ¡jjashahuaba tiitiquicue Jesosa Quitojo! Eyacuiñajjiya Jesosa Quito shequi mee ca o'oya

poa. Ojaya Jesusaja etiiquiana yahuajo nei nei ba'ya poa Dabi bajjani etiiquianaja emeshi mese poa.

⁹ Jiquio esohui quea pame nee Jesosa Quitojo eyaya huohuiaña. Jamajjeya dejja tai cuaa eya napa canaje, dejja quea mimishi poso eya jeanobia canaje. Jamatii. Dejja tai cuanaja eya Eyacuiñajjija esohui ehuohui pajea mee'yojji pojjeama.

¹⁰ Jamajjeya dejja cuaa eya napa cajje jamatii eya quea ca'a tii tii Jesusajo poani. Jamajjeya eyaya ojjaña Eyacuiñajjija ehabaca cuana quea ca'a po meesahuaje'yo. Jamajjeya Jesosa Quito-hua onajaya mimishi cuana cuijea neinei caje'yo. Oya cuana nequi tiitii mee caje'yo eyajo quea ja'a nee nee ese jayojja. Eyacuiñajji nijje nequi tiitiije'yo.

¹¹ Jiquio esohui e'e nei jama ba'a:
 “Eseyaya Jesusaja epeeji jjejojo pea cuaa mano mee ca'yajje Jesosa nijje eshe tiitii ba'eje'yo es-eya eyajo.

¹² Jjeya onijje jjapee tiitiiquianijo quiije Jesosa nijje ona huoojea'yojji poaje'yo. Jjeya eseyaya cajaa ajje ohuaya eseya quiije cajaa acaje'yo pea'ai.

¹³ Eseyaya ojaya esohui atiitii ajjajo, jamatii ohuaya eseya pajea'yo ajja. Ojjaña ojaya esohui jayojjaya jama acaje'yo tii, ohuaya. Oya esohui siajje a'ajja nei nei”.

Echacojji quea pame nee

¹⁴ Jamaya miyaya ecuea ehuohui'yo cuana esohui huohuijji cuana huasijje huohui huicha'a huicha'acue! Janobajjima nei huohuicue jama

ba'a: —Emeshi Mese neiya miya ba neinei canijo, ja'a mimicuiajea nobiajeajji!

Jjamimicuiajea nobiajeajji ca ca quea tai. Jamaya poanijo mi shajja'ajjajji poani cuana po-
quiquehua chana'.

¹⁵ ¡Quea ja'a nee nee oe jjashahuabaquicue quea pame nee Eyacuiñajji echacojji! Jamajjeya oya mijo quea jaji nee poaje. E'e, ¡miyaya ojaya esohui e'e nei huohucue quea ja'a nee! Jamajjeya miya ojaya echacojji quea pame nee poaje, bicho'ama.

¹⁶ Beca cuanaja Eyacuiñajji boti'ama, de. Jamajjeya ja'a shajja'ajjajji onajaya mimi quea tai Eyacuiñajji! Ma esohui tai shajja'ajja canijo pea cuaa Eyacuiñajji ba jjima acaje. E'e, esohui tai shajja'ajja majje jjashahuabaqui ajja poaje.

¹⁷ Tajjaja ijia biso nei anicuayani, quijje ijia huesha cani. Tajjaja ijia jayojja jama poani esohui quea tai. Esohui huohuijji taija esohui quea tai shajja'ajja majje quijje quea tai nee poaje'yo quea huiso cuana. Jjapeequi pajea caje'yo pojja'a. Jamaya esohui huohuijji nisho cuana Pineto bajjani, Imeneo pea'ai poani.

¹⁸ Ohuaya esohui e'e nei pajea ca'yonaje. Siajje poani jama ba'a: —Ojaya epeejji mano'yajo, Eyacuiñajjiya eyami eyacua aje oe e'a'yojji pojjeama —acani.

Jamajjeya beca cuana ma esohui taijoya po-
quiquehua mee cani. Eyacuiñajji esohui e'e nei pajea mee cani pea'ai, ma esohui huohuijji nishohua.

¹⁹ ¡A'a oya cuana shajja'ajjajji! Eseyca ca ca Eyacuiñajji nijje jjapeequi pajea'yo ajja. Eyacuiñajji esohui quea ja'a neejo jjashahuabaquiani. Equi

yamajjana quea ca'a nee nee nequi jayojja jama Eyacuiñajjija esohui nequi tiitiije'yo. E'e, yahuaajo nei nei esohui tehue mee ca poa jama ba'a: "Es-ejaya Emeshi Mese neija ebacua cuana ojaya eba ache ese ejja e'e jojo nei poaje". Pea tehue mee ca poa jama ba'a: "¡Eyacuiñajjija epeeji neiya mimishi cuana capajea neinei cayahua!" Jama yahuaajo nei tehue meemeya aca poa, Eyacuiñajjija.

²⁰ Cuanaya equi tii tiijo quea huiso aquiana cuana yani: ena ishijji cuana, ena nequijji cuana, ena shojji natajee oshe quea nahue siyosiyoyani. Ena nequijji mei huo'lo quea ca'a yani aquiana quea nahue iyajji. Acui epejja cuana yani, meshimisi pea'ai yani, ca'a'ama, aquiana nahue'ama iyajji.

²¹ Jiquio ecua ena nequijji ca'a'ama jayojja jama eseya poaje mimishijo. Eseyá mimishi cuana pajea'yo majje ena nequijji quea nahue jayojja jama poaje'yo. Jamajjeya mimishi pajea'yoyji chacoje'yo Eyacuiñajjijo. E'e, quea pame nee poanijo Eyacuiñajjija eseya huoojea caje'yo ojo chacohua. Jamaya eseya Eyacuiñajjija tii poaje'yo.

²² Jamajjeya ¡shacuima' nequija ejjashahuaba taiquijji jama a'a pojji miya! Jiquio jama quea bihui nee po huicha'acue ba'a: ¡Quea ja'a ba'ecue! ¡Eyacuiñajjija esohuijo jjabahuejja neinei quicue! ¡Pea cuana quea jea nee acue! ¡Ojjaña nijje quea bei pocue! Beca cuana quea bihui nee Eyacuiñajjija nijje mimiani. Quea ja'a nee jjashahuabaquiani pea'ai. ¡O jayojjaya oe pocue!

²³ ¡Esohui quea tai, quea quehua pea'ai a'a shajja'ajjaji! Ma esohui shajja'ajja majje dejja cuana

jjamimicuiajea nobiajeaquije. Jamaya miquea eba.

²⁴ Miya Eyacuiñajjija echacojji poanijo ca ja'a jjamimicuiajea nobiajeaquijji! Chojo. ¡Ojjaña nijje mase'ama pocue! ¡Jesosa Quitoja esohui cuana oe huohuicue quea pame nee! ¡A'a tecuea cuajijji pea'ai!

²⁵ Pea cuana esohui e'e neiyo maimaianijo, ¡quea bei esohui huohui o'oyacue! Jamajjeya e'e pojja'a Eyacuiñajjiya ojaya esohui e'e neiyo jjabahuejjaqui meesahua caje'yo oya cuana; jjashahuaba taiqui pajea mee caje'yo.

²⁶ Jamajjeya oya cuana quea ja'a nee jjashahuabaquije o'oya pojja'a, Eyacuiñajji nijje jjapeequije'yo. Joya esohuijo mimijajiani aje oe poquiquehua'yonaje de, Edosiquiana nijje. Ohuaya oya cuana dasia ca'yonaje o jayojja epo'yojji. ¡Oya cuana Eyacuiñajji nijje cajjapeequiahua! E'e, dejjaa ibia me' ijji mee cani. Ibia eme' ijji meeani, eme' jjequihuijjiajea majje poquiani. Eme' ijji mee'ajja jjabahuejjaquiani. Jiquio ecua ibia eme' ijji mee'ajja poe beca'yo ajja jayojja jama eshahuaja epeejiya dasia cajje eshajja'ajja becaqui'yojji pojjeama; jjabahuejjaquiani oya pojja'a.

3

Epojja apoa epojji

¹ Timoteo, jiquio ba neineicue pea'ai ba'a: Epojja cuana beshahua nei oe poajo, Jesosa Quito poe o'oya jjimahuajo, eba'ejji quea camaja nee nee

poaje ojjaña cuanaja dejja quea mimishi nee nee poanijo.

² E'e, dejja cuana ojaya aquiana cuanajo, ojaya eba'ejjijo, ejjeshejjijo pea'ai quea nahue poaje'yo. Quea dejja tai poaje'yo, quea nishehui poaje'yo epona cuana pea'ai. Bicho'ama jjejojo quea miminaa ojaya ejjashahuabaquijjijo poaje'yo tii tii. Eyacuiñajjija esohui huohuijji shajja'ajja sa po ajja poaje'yo. Mimijajjiji cuana pea'ai poaje'yo. Oja chiija, enaese pea'aija esohuijo shajjama' poaje'yo oya cuana. Ejeajji etii cuana, enaese etii pea'ai boti'ama acaje'yo: —Ecuea miya ebobajji pojjeama —acaje'yo.

Eyacuiñajjija esohui jama a sa po'yo ajja poaje'yo.

³ Ojaya huapa pojjeama cuana boti'ama acaje'yo pea'ai. Quea sapa ca'a jjejojo jjashahuabaqui ajja pea'ai. Pea cuanajo siajje poaje'yo. Mimishi cuana epajea mee'yojji pojjeama. Quea mase ibia jama poaje'yo. Mimipanajea panajeaje'yo pea nijje. Dejja quea pame nee boti'ama acaje'yo, cajaa acaje'yo pea'ai.

⁴ Pea nijje jjapee nishoquije'yo. Jjabahuejjaqui jjima tii tii poaje'yo. Jama siajje pome poaje ba'a: —Eya ca ca oe che oeya quea pame nee —niso poaje.

Quea mimijjequiya jjejojo Eyacuiñajji boti'ama poaje'yo.

⁵ Eyacuiñajji nijje jjapee nishoquije'yo. Jamatii ojaya esohui jayojja jama oya po ajja poaje. Timoteo, ja'a onijje jjapeequijji!

⁶ Jjeya nei esohui huohuijji tai cuana equi cuana huasijje poqui majamaja majje siajje poani.

Epona jjabahuejjaqui ja'a jjima cuana dasia cani. Jiquio epona cuana aje oe quea mimijjequijea nee nee; quea ja'a jjashahuabaqui'yo ajja, de. Ma dejja tai cuanaja esohui tai shajja'ajja sa poani.

⁷ Oya cuana ojjaña esohui quea quehua shajja'ajjajji jjejojo Jesosa Quitoja esohui e'e neiyo jjabahuejjaqui'yo ajja.

⁸ Jamaya yahuaajo nei nei ejiojjicuiajji cuana Janese, pea Jamese cuanaya nequia poa. Moisesija esohui shajja'ajja sa po ajja poa. Jjeyahua nei esohui huohuijji quea mimishi Janese, Jamese pea'ai jayojja jamaya yani. Oya cuana esohui e'e nei Jesosa Quitoja shajja'ajja sa po ajja pea'ai. Quea jjashahuabaqui tai nee nee poani pea'ai. Jamajjeya Eyacuiñajjiya oya cuana cajaa acaje'yo, Jesosa Quito nijje jjapeequi sa po ajjajo.

⁹ Quijje pishana quea huiso dejjaa jama acaje'yo ba'a: —E'e, joya esohui huohuijji tai cuana jjadasi-aqui'yojji, ejiojjicuiajji Janese, Jamese pea'ai jayojja poani —acaje cuaa. Jamajjeya jjadasia mee majamajaqui ajja poaje.

Paboya esohui apoa epojji nei Timoteo huasijje

¹⁰ Timoteo, miya enijje nequinajejo eya ca ca miquea eba nei nei poanaje. Ojjaña ecuea ehuhui'yo miquea eba pea'ai. Ojjaña ecuea eba'e'yojji miquea eba pea'ai. Ecuea ejjashahuabaqui'yojji quea pame nee. Miquea eba eya Eyacuiñajjiya epeejji nei poani. Pea cuaa eya napa cajje ona nijje quenequene ajja poa. Ecuea pea cuana quea jea nee. Eyaya mete'ama Eyacuiñajjiyo chaco titii'yonaje. Jamaya miquea eba pea'ai.

¹¹ E'e, miquea eba ecuea ehuohuijo pea cuaa janobajjima nei eya napa ca'yonaje Atioquiajo ba'e cuaa, Iconiojo ba'e cuaa, Nisatajo ba'e cuaa pea'ai. Napa majamaja cajje eya quea nee nee poanaje. Jamatii ecuea Jesosa Quitoja esohui pajea'yo jjima. Emeshi Mese neiya eya jaahuana tiitii ca'yonaje. Jamaya miquea eba, Timoteo.

¹² E'e de, ojjaña joya Jesosa Quito nijje jjapee neineiQuiani pea cuaa napa cajje.

¹³ Edasiajji cuana jjeyahua nei quea tai. Quijje ca ca quea tai nee nee poaje. Eshahua ma dejja tai cuana nijje siajje poanaje. Jamajjeya ma edasia'yoyji cuaa pea cuana dasia cajje'yo pea'ai.

¹⁴ Timoteo, miquea eba miquea esohui huohuijji cuanaja ehuohui'yo e'e nei. Ma ehuohui'yo cuanajo miya jjabahuejjaqui'yonaje. Jamajjeya jmaye esohui shahuaba tiitiicue; a'a pajea'yoyji! Jamaya oe acue!

¹⁵ Miyaya esho'yahuaa Eyacuiñajjija esohui quea pame nee ba neinei'yonaje. Ojaya esohui etehue'yo miquea eba. E'e, ma etehue'yojo miyaya bajje'yo jama ba'a: Eyacuiñajjiya miya jaahuana cajje'yo miya Jesosa Quito nijje jjapeequianijo.

¹⁶ Eyacuiñajjiya dejja pame cuana ojjaña ojaya esohui tehue mee ca'ya poa. Eseyaya jiquio esohui huohuiajje pea cuana Jesosa Quitojo jjabahuejjaquije'yo, ojaya mimishijo quea yeno poaje'yo pea'ai, ojjaña ba cajje'yo ache esohui e'e nei pojjeama pea'ai. E'e, ma esohui huohui majje ojjaña quea bojea nee ba'e meesahuaje'yo. Eba'ejji quea pame ba meesahuaje'yo pea'ai.

¹⁷ E'e, ma esohui etehue'yo quea ja'a nee ba ma-

jje Eyacuiñajjija echacojji quea ja'a nee poaje'yo. Ojjaña quea pame nee poaje'yo pea'ai Eyacuiñajji nijje, esohui ba neinei majje.

4

Pabo Eyacuiñajjiya sosequia caje'yo

¹ Eyacuiñajjija, Jesosa Quitoja pea'ai ecuea esohui eba. Jesosa Quito poe o'oya majje ojjaña huoojea'yojji poaje'yo. Yahuajo mano'yo cuana, jjeya eshe nequi cuana pea'ai sosequia caje'yo. Ojjaña ojaya epeejji cuana quea pame poani ba'e tiitii mee caje'yo onijje eyajo, Eyacuiñajjiya. Mimishi cuana ca ca quea nee nee po mee caje'yo cuaquijo.

² Jamajjeya eyaya miya huoojeaña jama ba'a: ¡Eyacuiñajjija esohui oe huohui tiitiicue jjeya, miyaya! Dejjaja cuana jjashajja'ajjaqui sa po ajjajo ¡jamatiiya huohuicue! Mimishi cuana acanijo ¡tecueajeaña jayojja acue! Jama acue ba'a: “¡A'a quea tai pojji! ¡A'a quea mimijjequijea pojji!” Pea cuana quea pame poanijo jama acue ba'a: “E'e, ¡jamaya Eyacuiñajjijo ba'ecue!” ¡Quea pame, quea mimi bei nee huohui tiitiicue ojjaña Eyacuiñajjija esohui!

³ Quijje ca ca dejjaja cuana esohui e'e nei shajja'ajja sa po ajja poaje. Quea mimishi ba'e sa poanijo oya cuana quea huiso esohui huohuijji tai iyaa caje ojaya ejjashahuabaqui'yojjijo huohuiya.

⁴ Eyacuiñajjija esohui e'e nei shajja'ajja sa po'yo ajja poaje. Etiiquianaja ehuohui'yo quea quehua cuana shajja'ajja caje'yo.

⁵ Timoteo, ¡miya ca oe quea ja'a nee nee jjashahuabaquicue ojjaña pojajajo! Peaa miya napa cajje ¡jamatii quea ca'a, mete'ama pea'ai

poque! ¡Eyacuiñajjija esohui Jesosa Quitoja huohui tiitiicue! ¡E'e jojo nei ojjaña ma ecua eyaya miya huohuinaje jamaya acue!

⁶ E'e, ecuea echacojji Eyacuiñajjija esohuijio jjeaya beshahua nei apoa poanijo, dejja mimishi cuaa eya mano mee caje'yo. Ijjiacajji jayojjaya mano mee'yome acaje'yo cuaa. Quijje pishana, jjeyahua nei pojja'a eya poquije'yo eyahuasijje Jesosa Quito que ba'e'yohua.

⁷ Eya janobajjima nei chacochocho'yonaje Eyacuiñajji nijje. Ecuea echacojji Jesosa Quitoja apoa. Eyacuiñajjija esohui jayojja jama a'yonaje e'e jojo nei eyaya. Jamajjeya eya onijje quea ja'a nee ba'yanijo, eya sosequia caje'yo eyajo.

⁸ Eseyaya Emeshi mese nei nijje quea pame nee chacochocho'yonaje, eya quea huiso sosequia caje'yo poe o'oya majje. Ohuaya eya huohui caje'yo jama ba'a: —Miya ecuea echacojji quea ja'a nee poanaje.

E'e, ojjaña ojaya epeejji cuaa ma ojaya epoe o'oyajjijo quea bihui neeya ishoa'ajja ca'ani Jesosa Quitoja sosequia caje'yo quea huiso pea'ai.

Pea esohui Timoteo que

⁹ Eya ee nei ani. Jamajjeya ijjeyahua nei poecua-jicue ee nei anijo!

¹⁰ Ecuea epeejji Quesete poquinaje Janata meshi yasiijje. Tito pea'ai poquinaje Damasia meshi yasiijje. Dejja Nema bajjani aje oe ojaya aquiana cuana quea boti neejo Eyacuiñajjijo jashahuabaqui ajja. E pajea'yo majje e que nequi'yo ajja. Oya poqui'yonaje Tesanonica huasijje.

11-12 Tiquico eyaya huoojea'yonaje Epeso huasi-jje. Noca ca ca oe enijje nequi. Jamajjeya miya e que poe o'oya majje ¡ecuea epeeji Macoso jje-queicue pea'ai! Ohuaya eya chacosahua caje'yo.

13 Ecuea daqui moo quea ao eyaya jeana'yonaje Toasajo, Capoja equijo. ¡Maya jjequi'yocue! ¡Esohui etehue'yo cuana pea'ai ye'yocue! ¡Esohui ejeejo tehue'yo cuana pea'aiya oe ye'yocue jjo!

14 Timoteo, Anejano ma baa huo'o chacoji poani janobajjima nei mimijajinaje enijje quea mimishi, de. Ojaya mimishijo Jesosa Quitohua oya napa caje'yo quijje.

15 Eseyaya Jesosa Quitoja esohui huohuiañajo oya janobajjima nei mimijajinaje pea'ai. ¡Jamajjeya oya ba neineicue! Oya quea tai, de.

16 Dejja etii cuaa eya jeanobia'yo majje iyaa ca o'oyanaje ehuohui'ajjaji ecuea esohuijo. Eya huohui'ajja coo canajejo, ecuea epeeji cuana enijje nequi ajja. E ejeanobiajojo oya cuana quea mete nee nee poanaje. Poquinaje. Eya jea cana'yonaje: —Paboya esohui Jesosa Quitojo e'e nei nei —jamaya huohuime ajjima ecuea epeejiija quea meteja jjejojo. Eya nahue jjima onajaya. Eya Eyacuiñajji nijje miminaje ona cuanajo. Jamajjeya e'e pojja'a Eyacuiñajjiija oya cuana etecueajeajji pojjeama quea mete poanijo.

17 Jamatii Jesosa Quito ecuea Emeshi Mese nei ca ca enijje nequi'yonaje. Ohuaya eya quea ca'a po mee ca'yonaje. Ojjaña ojaya esohui janobajjima nei huohuiañajo quea huiso cuana Jodio pojjeama shajja'ajja mee'yonaje. Pea cuana ibia jama quea mase e quecua sa poanijo, Eyacuiñajjiya eya jaahuana ca'yonaje pea'ai.

18 E'e, ojjaña ma dejja mase cuanajo ecuea Emeshi Mese neiya, Jesosa Quitohua eya jaahuana caje'yo. Ohuaya eya eyahuasijje dojosohuaqui caje'yo onijje ba'e'yohua. Jomajo oya ojjaña huoojea'yojji ca ca oe quea ca'a nee nee. ¡Oya ojjaña dejja cuaa cabihuia tiitii cahua! ¡Jamaya capo'yahua!

¡Ojjaña nijje mimicue quea bihui nee ejo!

19 Aquina, ojaya ehuanase Pisina pea'ai, Onesipono, ojaya huapa pojjeama cuana pea'ai jama huohucue miyaya ba'a: —¿Achajja acuae nequiana so'o?

20 Dejja Enasito bajjani nequinaje Conitojo. Topimo eyaya jeana'yonaje Mineto cuiñajjijo emano jaa.

21 ¡Poecuajicue e que, eeno po jjimahuajo!

Dejja Eomono bajjani, Ponete pea'ai, Nino pea'ai, Caonia pea'ai, ojjaña Eyacuiñajjija epeeji cuana pea'aiya miya huohui'ajja cani jama ba'a: —¿Achajja acuae mi ani so'o, de? —ojaya ebajji nequiana.

22 ¡Emeshi Mese neiya Jesosa Quitohua miya quea ja'a capo mee cahua! ¡Ohuaya ojjaña miqianaya cajaahuana cahua quea pame nee! ¡Jamaya capo'yahua!

Mahuiso. Eyaya Pabohua esohui tehue'yonaje. Apoa.

Eyacuiñajjija Esohui
New Testament in Ese Ejja (BL:ese:Ese Ejja)

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 18 Apr 2025 from source files
dated 29 Jan 2022

88838088-e20d-51ca-8c91-69194f5ae678